



Radosna vijest ustrajnama (Medina)

Hatib: dr. Ali ibn Abdurrahman el-Huzejfi

17. ševval 1445. po Hidžri / 26. april 2024.

Hvala Allahu, Milostivom, Samilosnom, Mudrom, Sveznajućem. Nema boga osim Njega, Gospodara Arša plemenitog. Hvalim svoga Gospodara i zahvaljujem Mu na blagodatima, za koje znamo i za koje ne znamo, i čiji broj ne zna niko osim Njega. Svjedočim da nema boga osim Allaha, Jedinog, Koji nema druga, Velikog, Uzvišenog, i svjedočim da je naš vjerovjesnik i prvak Muhammed, sallallahu alejhi ve sellem, Njegov rob i poslanik, odlikovan svakom plemenitom osobinom. Allahu moj, smiluj se, spasi i blagoslovi Svoga roba i poslanika Muhammeda, sallallahu alejhi ve sellem, i njegovu porodicu i sve njegove ashabe, sljedbenike Pravog puta.

Bojte se Allaha onako kako Ga se treba bojati, postići ćete svako dobro i spasit ćete se od svakog zla i propasti.

O vjernici, kako je samo velika i veličanstvena radosna vijest od Milostivog Gospodara, vlasnika savršenih riječi, Onoga Koji ispunjava Svoja obećanja, a radosna vijest ispunit će se onda kada se ispune njeni šartovi, preduvjeti, i zato se radujte obećanju Velikog i Uzvišenog, Koji je rekao: "Onima koji govore: 'Gospodar naš je Allah' – pa poslije ostanu pri tome – dolaze meleki: 'Ne bojte se i ne žalostite se, i radujte se Džennetu koji vam je obećan. Mi smo zaštitnici vaši u životu na ovome svijetu, a i na onome; u njemu ćete imati sve ono što duše vaše zažele, i što god zatražite – imat ćete, bit ćete počašćeni od Onoga Koji prašta i Koji je milostiv.'" (Fussilet, 30–32)

"Onima koji govore: 'Gospodar naš je Allah' – pa poslije ostanu pri tome...", upotpunjenje ovih riječi bilo bi: "njima dolaze meleki".

Riječi vjernika: "Gospodar naš je Allah" predstavljaju priznanje jezikom i vjerovanje, ubjeđenje u srcu, kao što kaže Uzvišeni: "Gospodaru naš, mi smo čuli glasnika koji





poziva u vjeru: 'Vjerujte u Gospodara vašeg!' – i mi smo mu se odazvali (povjerovali)." (Alu Imran, 193)

Pored verbalnog očitovanja vjerovanja i ubjeđenja u srcu, potrebna je i ustrajnost u dobrim djelima, što razumijemo iz riječi: "... pa poslije ostanu pri tome...", odnosno ustraju.

Prema tome, iman je čvrsto vjerovanje, ubjeđenje, riječ i djelo.

Istikamet – ustrajnost i postojanost u vjeri je uzvišena stvar, a najveći stepen istikameta jeste izvršavanje farzova – strogih vjerskih dužnosti, vadžiba – obaveza i mustehaba – preporučenih djela, a ostavljanje harama – strogo zabranjenih djela i mekruha – pokuđenih djela i ustrajavanje u tome, kao što je Allah naredio Svome Poslaniku: "Ti idi Pravim putem, kao što ti je naređeno, i nek tako postupe i vjernici koji su uz tebe, i objesni ne budite, jer On dobro vidi ono što radite." (Hud, 112)

Vjernici se u pogledu istikameta mogu podijeliti u nekoliko kategorija, kao što kaže Uzvišeni: "Hvaljen neka je Allah", govorit će, "koji je od nas tugu odstranio – Gospodar naš, zaista, mnogo prašta i blagodaran je." (Fatir, 32–33)

Riječi meleka: "... ne bojte se i ne žalostite se...", upućene su vjernicima u trenutku napuštanja ovog svijeta i prelaska na onaj svijet, ahiret. Kao vid podrške i nagrade za istikamet – ustrajnost, postojanost, govorit će im: "Ne bojte se!", a strah može biti samo od nečega što bi se moglo desiti u budućnosti, tj. ne bojte se za svoje porodice, koje ste ostavili iza sebe, Allah će se pobrinuti za njih, On se brine o Svojim čestitim robovima.

"... i ne žalostite se", a žaliti se može samo za onim što je prošlo, tj. ne žalostite se zbog onoga što je bilo, vrijeme žalosti je prošlo i nikada se više neće vratiti.

Ovom radosnom viješću, za onoga ko ustraje na Pravom putu, garantuje se sigurna budućnost, i da se žalost i tuga više nikada neće vratiti.

Meleki će im, također, govoriti: "... i radujte se Džennetu koji vam je obećan", a Uzvišeni kaže: "Allah će, zaista, održati obećanje." (Alu Imran, 9)





“U Džennetu ima ono što oko nije vidjelo, što uho nije čulo i što srcu nije naumpalo.”

(Buhari od Ebu Hurejre, radijallahu anhu)

“Mi smo zaštitnici vaši u životu na ovome svijetu, a i na onome”, meleki su zaštitnici vjernika na dunjaluku, podržavaju ih i pomažu. Uzvišeni kaže: “Kada je Gospodar tvoj nadahnuo meleke: ‘Ja sam s vama, pa učvrstite one koji vjeruju!’” (El-Enfal, 12)

Meleki ulijevaju sigurnost u srce vjernika, bodre ga i podstiču da vjeruje u Allahovo obećanje, i tjeraju od njega šejtanska došaptavanja – vesvese. U tom kontekstu Abdullah ibn Mesud, radijallahu anhu, prenosi da je Vjerovjesnik, sallallahu alejhi ve sellem, rekao: “Šejtan i melek imaju svoje djelovanje na čovjeka. Djelovanje šejtana je nagovaranje na zlo i poricanje istine, a djelovanje meleka je nagovaranje na dobro i potvrđivanje istine.”

Meleki štite vjernike na ovom svijetu i time što ih čuvaju od šejtana. Uzvišeni kaže: “Uz svakog od vas su meleki, ispred njega i iza njega – po Allahovu naređenju nad njim bdiju.” (Er-Ra’d, 11)

Uz njih su i prate ih u svakom dobru i dobročinstvu.

Oni su njihovi zaštitnici i na ahiretu, kao što kaže Uzvišeni: “... i meleki će im ulaziti na svaka vrata: ‘Mir neka je vama, zato što ste trpjeli, a divno li je najljepše prebivalište!’” (Er-Ra’d, 23–24)

Radosne vijesti od meleka vjernicima, po Allahovom naređenju, dolaze jedna za drugom, a posljednja u nizu tih vijesti jesu njihove riječi: “... u njemu ćete imati sve ono što duše vaše zažele, i što god zatražite – imat ćete.” (Fussilet, 31)

To jeste, imat ćete sve što zaželite i više od toga, i dobit ćete sve što zatražite i zamolite, kao počast i nagradu od Onoga Koji mnogo prašta grijeha i Koji je milostiv prema vjernicima, na poseban način i u posebnom smislu. “Nuzul” je u arapskom jeziku naziv za sve ono što se priprema za gosta. Na sličan način o nagradi za ustrajnost na Pravom putu govore i kur’anski ajeti: “Oni koji govore: ‘Naš Gospodar je Allah!’ – i istraju na Pravome putu, neka se ničega ne boje i ni za čim neka ne





tuguju! Oni će stanovnici Dženneta biti, i u njemu će vječno boraviti, i to će im biti nagrada za ono što su radili." (El-Ahkaf, 13–14)

Jedan od najvažnijih Poslanikovih savjeta, koji je obuhvatio kompletnu vjeru, jesu njegove riječi Sufjanu ibn Abdullahu, radijallahu anhu: "Reci: 'Vjerujem u Allaha', a zatim ustraj." (Muslim)

Lijepo bi bilo da musliman ima na umu ove veličanstvene ajete i da razmišlja o njima kada god uradi dobro djelo, nadajući se Allahovoj milosti i strahujući od Njegove kazne, kako bi mu se On smilovao, zaštitio ga od Svoje kazne i od poniženja na ahiretu.

Muslimani se razlikuju u stepenu istikameta, ustrajnosti i postojanosti. Na najvećem stepenu i u najboljem stanju jesu oni koji ustrajno čine dobra djela, jedna nakon drugih, i čuvaju se harama. Oni su "sabikun – odabrani", oni koji su pretekli druge u dobru. Uzvišeni kaže: "... i oni prvi – uvijek prvi! Oni će Allahu bliski biti, u džennetskim baščama naslada." (El-Vakia, 10–12)

Stepen ispod njih jesu oni koji čine dobra djela i neke grijehe, i koji nakon grijeha učine dobro djelo. Uzvišeni kaže: "I obavljaj molitvu početkom i krajem dana, i u prvim časovima noći! Dobra djela zaista poništavaju hrdava. To je pouka za one koji pouku žele." (Hud, 114)

Musliman koji se spusti ispod ovog stepena izmiješao je dobra i loša djela, i kao takav tretira se prema djelima koja prevladaju, i njegov status na onom svijetu zavisit će od Allahove volje i milosti. Uzvišeni kaže: "I povratite se Gospodaru svome i pokorite Mu se prije nego što vam kazna dođe – poslije vam niko neće u pomoć priskočiti." (Ez-Zumer, 54)

Bojte se Allaha, činite ono čime je On zadovoljan i klonite se Njegovih zabrana, postići ćete Njegovo zadovoljstvo i Džennet. Uzvišeni kaže: "Ko uradi dobro djelo, bit će deseterostruko nagrađen, a ko uradi hrdavo djelo, bit će samo prema zasluži kažnjen, i neće im se učiniti nepravda." (El-En'am, 160)





Ovaj ajet znači da onaj ko uradi dobro djelo i sačuva ga od svih stvari koje ga mogu pokvariti (mubtilat), bit će deseterostruko nagrađen, pa i više od toga.

Čini dobra djela i kloni se harama, i postupaj prema Poslanikovoju preporuci: "Boj se Allaha gdje god budeš, nakon lošeg uradi dobro djelo, koje će ga pobrisati, i prema ljudima se ophodi na lijep način." (Ahmed i Tirmizi)

Donosite salavate na Poslanika, sallallahu alejhi ve sellem, podarenu milost i nepresušnu blagodat, to vam je naredba od vašeg Gospodara, Koji je objavio: "Allah i meleki Njegovi blagosiljaju Vjerovjesnika. O vjernici, blagosiljajte ga i vi i šaljte mu pozdrav!" (El-Ahzab, 56)

Allah podario blagoslov meni i vama u časnom Kur'anu, i okoristio mene i vas njegovim ajetima i mudrom opomenom. Rekoh ovo i od Allaha Uzvišenog tražim oprost za sebe, vas i sve muslimane od svakog grijeha, a tražite i vi, On mnogo prašta i milostiv je.

